

आकाशवाणी

खबरां ----

1. एन.टी.ए. नै यू.जी.सी-नेट 2026 दे 84 सब्जैक्टें दे जवाब जारी कीते न। इनें जवाबें गी चनौती देने लेई ओबजेक्शन विंडो मंगलवार तगर खुल्ली रौहग।
2. झारखंड च जे.पी.एस.सी-जे.एस.एस.सी स्तेहान च होई दी गड़बड़ी दे खलाफ प्रदर्शन करा'रदे विद्यार्थियें मुखमंत्री हेमन सोरेन थमां इस्तीफे दी मंग कीती।
3. केंद्री गृह मंत्री अमित शाह होरें राजस्थान च पूर्व प्रधानमंत्री अटल बिहारी वाजपेयी हुं'दी प्रतिमा दा अनावरण कीता।
4. उत्तर पच्छमी बंगाल दी खाड़ी उप्पर बने दे नमें घट्ट दबाऽ दे कारण उत्तरी ओडिश च हाड दा खतरा बधी गेआ ऐ।
5. बैडमिंटन च भारत कल्लै थमां शुरू होने आहली बीडब्ल्यूएफ विश्व चैंपियनशिप दी मेजबानी करने लेई तैयार।
6. ते क्रिकेट च बंगलादेश नै आस्ट्रेलिया च पैहले टेस्ट मैच च ऐतिहासिक जित्त हासल कीती।

<><><><><><>

NTA-Answer Key

राश्ट्री सतह पर स्तेहान लैने आहली एजेंसी-एन.टी.ए नै इस बःरे जून महीने च होए दे यू.जी.सी-नेट स्तेहान दे 84 सब्जैक्टें दे जवाब जारी करी दित्ते न। एक्स पर कीती गेदी इक पोस्ट च एनटीए नै आखेआ ऐ जे मेदवार 18 अगस्त तगर इनें जवाबें गी चुनौती देई सकदे न। फही उत्तर पर ऐतराज ताई 200 रुपें दा शुल्क देना पोग ते ऐतराज दे समर्थन च दस्तावेज बी जमा करोआने पोडन। एनटीए नै

दस्सेआ ऐ जे अंग्रेजी, कामर्स ते सोशालोजी सब्जैक्टें दे प्रश्न पत्रें च मुमकन गलतिएं कन्नै जुड़ी दियें शकैतें दी जांच ताई इक्क कमेटी गठित कीती गई ही। कमेटी दियें सफारशें दी बिनाह पर इनें त्रोनें सब्जैक्टें बारै बक्खरी सूचना जारी कीती जाहग।

<><><><><><>

Jharkhand Protests

झारखंड च जे.पी.एस.सी-जे.एस.एस.सी दे मेदवारें दा आंदोलन होर तेज होई गेआ ऐ। प्रदर्शनकारियें भर्थी म्तेहानें च गड़बड़ी दे आरोपें लेई पैहली बारी मुखमंत्री हेमंत सोरेन थमां इस्तीफे दी मंग कीती ऐ। प्रदर्शन अज्ज 22में दिन च दाखल होई गेआ ऐ ते विद्यार्थी नेताएं दा आखना ऐ जे उंदी मुख मंगें गी अजें तगर हल नेई कीता गेआ। जे.पी.एस.सी-जे.एस.एस.सी सुधार मंच नै राज्य सरकार गी 18 अगस्त तगर सकारात्मक कार्रवाई करने दा अल्टीमेटम दित्ता ऐ। प्रदर्शनकारियें पैहली बारी मुखमंत्री हेमंत सोरेन हुंदे इस्तीफे दी मंग बी कीती ते 20 अगस्त गी मुखमंत्री हुंदे निवास दे बाहर बड्डा प्रदर्शन करने दा ऐलान कीता ऐ।

<><><><><><>

BRICS-Env. Min. Meeting

भारत मंगलवारें नमीं दिल्ली च 12मीं ब्रिक्स पर्यावरण मंत्रियें दी बैठक दी मेजबानी करग। इस बैठक थमां पैहलें कल ब्रिक्स वरिष्ठ अधिकारियें दी बैठक होग जेदे च पर्यावरण कार्य समूह ते जलवायु बदलाव ते टिकाऊ विकास सरबंधी संपर्क समूह शामिल होडन। एहू कार्यक्रम भारत दी ब्रिक्स अध्यक्षता-2026 दे व्यापक विशे लचीलेपन, नवाचार, सहयोग ते टिकाउपन आस्तै निर्माण दे तैहत होग। ब्रिक्स पर्यावरण मंत्रियें दी बैठक दी अध्यक्षता केंद्री पर्यावरण, जंगलात ते जलवायु बदलाव सरबंधी मंत्री भूपेंद्र यादव करडन। पर्यावरण सरबंधी मंत्रालय नै आखेआ ऐ जे अध्यक्षता दे दरान भारत नै ब्रिक्स पर्यावरण कार्य समूह दे तैहत सहयोग आस्तै चार प्राथमिक क्षेत्रें दी पंछान कीती ऐ।

<><><><><><>

BJP-Congress

भारती जनता पार्टी नै कांग्रेस पर राष्ट्रगीत वंदे मातरम दे बरोध दा आरोप लाया ऐ। पार्टी प्रवक्ता प्रदीप भंडारी होरें नमीं दिल्ली च संवाददाता सम्मेलन च आखेआ जे कांग्रेस मुख्यालय च स्वतंत्रता दिवस समारोह च वरिष्ठ कांग्रेस नेता, सोनिया गांधी होरें वंदे मातरम देगायन गी रूकोआने दी कोश्ट कीती। उनें दावा कीता जे ऐसा करियै कांग्रेस नै राष्ट्रगीत दा अपमान ते कीता गै कन्नै गै संविधान ते देशै दी जनता दा अपमान बी कीता। बीजेपी दे आरोपें पर कांग्रेस प्रवक्ता जयराम रमेश होरें आखेआ जे स्वतंत्रता दिवस पर पार्टी मुख्यालय च वंदे मातरम दा पूरा गायन होआ हा।

<><><><><><>

Keralam-Oman

केरलम च राज्य दे सबनें थमां बड्डे सलाना त्यौहार थिरुवोनम दी तैयारियें कन्नै उत्सवी माहौल बनी गेदा ऐं थिरुवोनम 26 अगस्त गी मनाया जाह्ग। ओनम दे उत्सव दी शुरूआत अज्ज अथम कन्नै होई गेई ऐ। अथम दा इक खास आकर्षण अथापूक्कलम ऐ। एहू रंग-बरंगे फुल्लें कन्नै बनाया जाने आह्ला फुल्लें दा कलीन हुं'दा ऐ जेहडा घरें च बनाया जंदा ऐ। थिरुवोनम तगर हर रोज इस च नमें फुल्ल जोडे जंदे ना। सबरीमाला च मंदर अज्ज मासिक पूजा लेई खोलेआ गेआ। खास ओनम पूजा 24 थमां 28 अगस्त तगर होग।

<><><><><><>

HM-Vajpayee

केंद्री गृह मंत्री अमित शाह होरें आखेआ जे साबका प्रधानमंत्री अटल बिहारी बाजपेयी होर प्रधानमंत्री बनने सवां पैहले बडे चिरें धोड़ी विपक्ष च रेह पर उनें कदें बी अपने सिद्धांतें कन्नै समझौता नेई कीता। उनें आखेआ जे तां गै उनेंगी अजात शत्रु दे नां कन्नै जानेआ जंदा हा। अजातशत्रु मतलब जेहदा कोई शत्रु नेई होऐ। शाह होरें एहू गल्ल अज्ज राजस्थान दे चितोड़गढ़ च इक कार्यक्रम गी संबोधित करदे

होई आक्खी। शाह होरें इस मौके पर अटल बिहारी बाजपेयी हुंदी मूर्ती थमां परदा गोआड़ेआ ते कोई विकास परियोजनाएं दा उद्घाटन कीता। शाह होरें आखेआ जे बाजपेयी होरें प्रधानमंत्री दे तौरा पर देसै गी म्हेशां पैहले रक्खेआ ते केई ऐतिहासिक फैसले बी लैते। उनें आखेआ जे बाजपेयी हुंदे दौर च गै जनजातीय मामलें सरबंधी मंत्रालय खड़ेआ गेआ हा। उनें आखेआ जे बाजपेयी होरें जनजातीय समुदाय दे लोके लेई डे कम्म कीते हे।

<><><><><><>

Tiranga-Yatra

हर घर तिरंगा अभियान दे चलदे करनाल च इक तिरंगा जात्तरा कड़ी गेई। ध्यानजोग ऐ जे हर घर तिरंगा अभियान मुल्लख भरै च 17 अगस्त तगर मनाया जा'रदा ऐ। केंद्री उर्जा मंत्री मनोहर लाल होरें जात्तरा गी खाना कराया। बड़ी मती गिनतरी च लोक हथें च तिरंगा फगड़ियै भारत माता दी जय ते वंदे मातरम दे नारे लांदे होई जात्तरा च शामिल होए। केंद्री मंत्री होर आपूं मोटरसाइकल पर तिरंगा जात्तरा च शामिल होए जेहदा मकसद राष्ट्र दी एकता ते अखंडता गी मजबूत करने ते देसै दी तरक्की च योगदान देना हा।

<><><><><><>

JK-Artist Lucknow

जम्मू-कश्मीर दी कला, संस्कृति ते भाशाएं सरबंधी अकादमी नै कल लखनऊ दे सचिवालय मैदान च लगे दे 80में स्वतंत्रता दिवस समारोह च हिस्सा लैता। इस शानदार सांस्कृतिक कार्यक्रम च उत्तर प्रदेश दे मुख्यमंत्री योगी आदित्यनाथ होरें बतौर मुख परौहने शिरकत कीती। समारोह च देसै दे बक्ख-बक्ख हिस्सें थमां आए दे तकरीबन 300 कलाकार शामिल होए। जम्मू-कश्मीर दे कलाकारें दे प्रदर्शन दी दर्शकें सने खास लोकें सराहना कीती। जम्मू-कश्मीर दे ग्रुप कन्नै गल्लकत्थ करदे होई मुख्यमंत्री होरें प्रदेश दे कलाकारें दी शानदार प्रस्तुति लेई उंदी तरीफ कीती।

<><><><><><>

Census

जम्मू-कश्मीर ते लद्दाख दे बर्फीले इलाकें च रौहने आहले लोकें ताईं आपुं जनगणना करने आस्तै डिजिटल सेल्फ इनुमेरेशन कल्लै थमां रम्भ होई जाह्ग ते औने आहली मर्दमशुमारी दे कम्म दे हिस्से दे तौरा पर 31 अगस्त तगर उपलब्ध रौह्ग। मुख् प्रिंसीपल जनगणना अधिकारी अमित शर्मा होरें इक्क समाचार एजेंसी कन्नै गल्ल करदे होई दस्सेआ जे सरकारी अमला इस कम्म लेई पूरी चाल्ली तैयार ऐ। श्री शर्मा होरें आबादी दी गिनतरी गी मर्दमशुमारी दा सबनें शा जरूरी हिस्सा दस्सेआ कीजे एह्दे राएं जन्म मृत्यु दे आंकडें सरबन्धी पूरी जानकारी ते होर दुए जरूरी मानदंड थ्होड्न्। उनें दस्सेआ जे इस कम्म च तकरीबन 40 सोआल होड्न्।

<><><><><><>

Cyber Security

राश्ट्री इलेक्ट्रानिक्स ते सूचना प्रौद्योगिकी संस्थान नै साइबर कुश्ती 2026 नां दी इक राश्ट्री साइबर सुरक्षा ते ए.आई हैकाथान दा शुभारम्भ कीता ऐ। एह्दा मकसद साइबर सुरक्षा आंकलन च मनुक्खी फैसले लैने दी क्षमता दा परीक्षण ते उसी मान्यता देना ऐ। साइबर कुश्ती लेई कल्लै सवां शुरू होए दा पंजीकरण 10 तरीक तगर जारी रौह्ग। मंत्रालय नै दस्सेआ जे एह्दे च भागीदारी निशुल्क ऐ ते त्रै सदस्यें दी टीमें च छात्र ते स्वतंत्र शोधकर्ता हिस्सा लेई सकदे ना।

<><><><><><>

IMD-Odisha

उत्तर पच्छमी बंगाल दी खाड़ी पर बने दे नमें घट्ट दबाऽ दे कारण उत्तरी ओडिशा च हाड़ दा खतरा होर बधी गेआ ऐ। मौसम मैहकमे नै मंगलवार तगर भारी थमां मती भारी बरखा पौने दी पेशनगोई कीती ऐ। बैतरणी, ब्रह्ममाणी, सालंदी, जालका ते बुधबलंगा नदियें च पानी लगातार बधा करदा ऐ जिस कारण बालासोर, भद्रक, जाजपुर, मयुरभंज, क्योँझर ते केंद्रापारा सने 6एं जिलें गी हाई अलर्ट पर रक्खेआ गेदा ऐ।

<><><><><><>

BWF-World C'ship

भारत कल्लै थमां लेइयै 23 अगस्त तगर नमीं दिल्ली दे इंदिरा गांधी स्टेडियम च बीडब्ल्यूएफ विश्व चैंपियनशिप दी मेजबानी करग। 2009 दे बाद भारत दुई बारी इस प्रतिष्ठित टूर्नामेंट दी मेजबानी करा करदा ऐ। भारती खडारी 2011 थमां लेइयै हर विश्व चैंपियनशिप च घट्ट कोला घट्ट इक तगमा जित्ते आए न। भारत नै पिछलियें 11 चैंपियनशिपें च कुल 14 तगमे अपने नांऽ कीते न। महिला सिंगल्स च पी.वी सिंधू भारत दी अगुवाई करंगन। पूर्व विश्व चैंपियन सिंधु होर इस सीजन जपान ओपन जित्ते दे बाद विश्व चैंपियनशिप च अपना 6मां तगमा जित्ते लेई उतरङ्गन। मर्दे दे सिंगल्स च लक्ष्य सेन शानदार प्रदर्शन करदे होई अगड़ा पुज्जने दी कोश्ट करङ्गन। दुई बक्खी आयुष शेटी अपने पैहले राउंड च मौजूदा चैंपियन ते टाप सीड चीन दे शी यूकी कन्नै मकाबना करंगन।

<><><><><><>

Cricket

क्रिकेट च बंगलादेश नै अज्ज आस्ट्रेलिया दे डारविन च मरारा ओवल मैदान च खेड्डे गेदे पैहले टेस्ट मैच च आस्ट्रेलिया गी 9 विकेटें कन्नै हराइयै ऐतिहासिक जित्त हासल कीती ऐ। एह आस्ट्रेलियाई धरत पर बंगलादेश दी पैहली टेस्ट जित्त ऐ ते आस्ट्रेलिया दे खलाफ उंदी दुई जित्त ऐ। मेहदी हसन मिराज इस मैच दे मुख खडारी रेह। उनें पैहली पारी च महत्वपूर्ण अर्धशतक लाया ते दुई पारी 5 विकेटां लेइयै आस्ट्रेलिया दी पारी गी 284 रन्ज उप्पर समेटी दित्ता। आस्ट्रेलिया आसेआ कैमरन ग्रीन नै 104 रन्ज दी पारी खेड्डी। उंदा एह टेस्ट क्रिकेट दा त्रिया शतक ते आस्ट्रेलिया दी धरत पर पैहला शतक हा।

<><><><><><>

DRI

डायरेक्टोरेट आफ रेव्यू इंटेलीजेंस नै भारत च दक्खन पूर्वी एशियाई नट्स गी गलत तरीके कन्नै बंगलादेशी मूल दी दस्सियै आयात करने आहले इक बड्डे नेटवर्क दा पर्दाफाश कीता ऐ। इस नेटवर्क पर

दक्खन एशियाई मुक्त बपार क्षेत्र दे तैहत रियायती शुल्क दे फैयदे गी धोखे कन्नै हासल करने दा आरोप ऐ।

<><><><><><>

IMD

भारती मौसम मैहकमे नै कल तगर अरूणाचल प्रदेश, गंगा पच्छिम बंगाल, ओडिशा, उत्तर प्रदेश ते उत्तराखंड च भारी बरखा पौने दी मेद दे चलदे ओरेंज अलर्ट जारी कीता ऐ। मौसम मैहकमे नै हिमाचल प्रदेश, जम्मू-कश्मीर, कोंकण, गोवा, महाराष्ट्र, मध्य प्रदेश ते उत्तर पूर्वी भारत दे किश हिस्सें च बी कल तगर भारी बरखा दी पेशगोई कीती ऐ। मौसम मैहकमे नै अगले दो दिनें दरान आंध्र प्रदेश, तमिलनाडू, पुदुचेरी, कराईकल, बिहार, झारखंड ते अंडमान ते निकोबार द्वीप समूह च बढ़ल गरजने ते बिजली चमकने दी मेद जताई ऐ।

<><><><><><>